



Broj/Број: 03/1-50-1-9-6/07
Sarajevo/Сарајево, 10.9.2007. godine

Z A P I S N I K

6. sjednice Zajedničke komisije za odbranu i sigurnost BiH Parlamentarne skupštine BiH, održane 10.9.2007, u vremenu od 11,00 do 13,30 sati

Sjednici su prisustvovali članovi Zajedničke komisije: Branko Zrno, Šefik Džaferović, Jozo Križanović, Hazim Rančić, Slobodan Šaraba, Adem Huskić, Mirko Okolić, Vinko Zorić, Dušanka Majkić, Drago Kalabić i Ivo Miro Jović.

Sjednici iz opravdanih razloga nije prisustvovao Sulejman Tihić.

Sjednici su prisustvovali predstavnici predlagača akata, kao i gosti:

- Bruce Mc Lane, savjetnik za politička pitanja Štaba NATO-a u Sarajevu;
- Momčilo Novaković, poslanik u Predstavničkom domu PSBiH;
- Selmo Cikotić, ministar odbrane BiH;
- Igor Crnadak, zamjenik ministra odbrane BiH;
- Muhamed Smajić, sekretar Ministarstva odbrane BiH;
- Samir Agić, pomoćnik ministra sigurnosti za civilnu zaštitu;
- Idriz Brković, Ministarstvo sigurnosti BiH;
- Ranko Mavrak, Jasmin Mekić, Lejla Hadžihasanović i Lejla Dizdarević iz Štaba NATO-a u Sarajevu;
- Jelena Despot iz OHR-a;
- Christian Haupt, Dušan Zoller i Jasna Dragičević iz Misije OSCE-a u BiH;
- Dragica Hinić, sekretar Zajedničke komisije za odbranu i sigurnost BiH, Željko Grubešić, savjetnik u Zajedničkoj komisiji za odbranu i sigurnost BiH, i Jovica Katić, stručni saradnik.

Sjednicom je predsjedavao Branko Zrno.

Predsjedavajući je predložio da se, zbog obaveza gostiju iz Štaba NATO-a, predloženi dnevni red izmijeni tako da 5. tačka postane 2. tačka, a dosadašnje tačke 2., 3. i 4. postanu tačke 3., 4. i 5.

Prijedlog predsjedavajućeg jednoglasno je prihvaćen, te je time usvojen sljedeći

DNEVNI RED

1. Usvajanje Zapisnika 5. sjednice Zajedničke komisije;
2. Informacija Štaba NATO-a u Sarajevu o Nacrtu zakona o zaštiti i spašavanju ljudi i materijalnih dobara od prirodnih i drugih nesreća u BiH (sačinilac: Ured savjetnika za politička pitanja Štaba NATO-a u Sarajevu);

3. Razmatranje Prijedloga zakona o dopunama Zakona o odbrani BiH (predlagači: poslanik Momčilo Novaković i delegat Slobodan Šaraba);
4. Prijedlozi mjera za rješavanje problema navedenih u Informaciji Granične policije BiH o stanju u ovoj instituciji, dostavljenoj po zaključku Zajedničke komisije (sačinilac: Granična policija BiH);
5. Zahtjev Odbora za sigurnost NSRS-a za dostavljanje informacije o pitanjima provođenja Zakona o odbrani BiH i Zakona o službi u OSBiH, kao i zakona iz oblasti sigurnosti;
6. Razmatranje prijedloga zaključaka s radionice održane na Jahorini o temi: „Stanje u oblasti naoružanja i municije u Bosni i Hercegovini“;
7. Razmatranje Peticije-zahtjeva za dodjelu tuzlanske kasarne „Husein-kapetan Gradašević“ Univerzitetu u Tuzli (podnosioci: udruženja građana);
8. Tekuća pitanja:
 - a) Poziv Zajedničkoj komisiji za posjetu Parlamentu, radnim tijelima i nadležnim ministarstvima SR Njemačke, od 23.10. do 26.10.2007.;
 - b) Poziv Zajedničkoj komisiji za posjetu Štabu NATO-a u Briselu, od 11.11. do 14.11.2007.;
 - c) Poziv za radni sastanak o malom i lakom naoružanju i municiji i njegovom raspolaganju, 13.9.2007. u Sarajevu (Radna grupa Ministarstva odbrane BiH);
 - d) Poziv MVP-a za učešće u modulu o temi: „Parlamentarne perspektive u oblasti odbrambene i sigurnosne politike EU“;
 - e) Poziv za sastanak eksperata Maršal Centra o Individualnom partnerskom akcionom planu (IPAP), 14.9.2007. u Sarajevu;
 - f) Poziv Ministarstva odbrane BiH na diskusiju o Nacrtu procjene planiranja i revizije i razvoja partnerskih ciljeva za BiH, od 24.9. do 26. 9. 2007.

Ad. 1. Usvajanje Zapisnika 5. sjednice Zajedničke komisije za odbranu i sigurnost

Primjedbe na Zapisnik 5. sjednice imali su članovi Komisije Jozo Križanović i Adem Huskić u dijelu koji se odnosio na raspravu o Informaciji o stanju sigurnosti. Jozo Križanović naveo je da je u svojoj diskusiji o ovoj temi naglasio da u BiH stanje sigurnosti nije ni najmanje stabilno kako je to Zapisnikom konstatirano, već naprotiv, dok je Adem Huskić istakao da treba utvrditi drugačiju listu sigurnosnih prioriteta nego što je to data lista, na kojoj se na jednom od prvih mjesta nalazi pitanje sigurnosti u saobraćaju. Zato su predložili da se Zapisnik u tim dijelovima korigira.

S navedenim ispravkama, Zapisnik 5. sjednice članovi Zajedničke komisije usvojili su jednoglasno.

Ad. 2. Informacija Štaba NATO-a u Sarajevu o Nacrtu zakona o zaštiti i spašavanju ljudi i materijalnih dobara od prirodnih i drugih nesreća u BiH (sačinilac: Ured savjetnika za politička pitanja Štaba NATO-a u Sarajevu)

Bruce Mc Lane, savjetnik za politička pitanja Štaba NATO-a u Sarajevu, pozdravio je prisutne članove Komisije, predstavnike Vijeća ministara BiH i goste, izražavajući zadovoljstvo što se ponovo nalazi u Parlamentarnoj skupštini BiH. S obzirom da se, kako je naglasio, uloga NATO-a prvenstveno zasniva na pružanju podrške Ministarstvu sigurnosti BiH u ovoj oblasti, on je zamolio da se Komisiji prethodno obrati Samir Agić, pomoćnik ministra sigurnosti za civilnu zaštitu.

Samir Agić istakao je da se u BiH u posljednja dva mjeseca desilo nekoliko ozbiljnih prirodnih nepogoda koje su rezultirale katastrofama. Informirao je prisutne o procesu izrade teksta Zakona o zaštiti i spašavanju ljudi i materijalnih dobara od prirodnih i drugih nesreća u BiH i njegovim ciljevima. On je prezentirao sve slabosti koje su se pokazale na terenu prilikom lokaliziranja i gašenja požara, kao i one slabosti koje se odnose na institucije Bosne i Hercegovine na svim nivoima vlasti. S ciljem prevazilaženja sadašnje teške i nedefinirane situacije u oblasti sistema zaštite i spašavanja u BiH i stvaranja uslova za efikasno djelovanje državnih institucija na zaštiti

ljudskih i materijalnih dobara, članovima Zajedničke komisije prezentirao je zaključke koje je Radna grupa za izradu teksta Zakona o zaštiti i spašavanju ljudi i materijalnih dobara od prirodnih i drugih nesreća u BiH napravila, te predložio da se oni upute i Vijeću ministara BiH i Predsjedništvu BiH.

Bruce Mc Lane izrazio je zadovoljstvo saradnjom s predstavnicima Ministarstva sigurnosti BiH o ovom pitanju. Napomenuo je da je od priključenja BiH programu Partnerstvo za mir NATO-a intenzivirao svoje aktivnosti na davanju savjeta Ministarstvu sigurnosti BiH o tome kako da na najbolji način ispuni svoje obaveze u oblasti planiranja u slučaju civilnih vanrednih situacija i upravljanja katastrofom. Kao dio tog procesa ponuđen je i operativni, pravni i politički savjet s ciljem podrške radnoj grupi za izradu nacrtu ovog zakona, te istakao da je dosta prijedloga i ugrađeno u Zakon. U daljnjem izlaganju predstavio je ciljeve NATO-a definirane tokom izrade Nacrta zakona, zatim istakao interes i angažman ambasadora zemalja članica NATO-a, te izrazio očekivanja NATO-a u pogledu rješavanja i prevazilaženja ovih problema i daljnjeg djelovanja predstavnika institucija vlasti u BiH na ovom polju.

Cjelokupna izlaganja Samira Agića i McLane-a nalaze se u prilogu ovog zapisnika i čine njegov sastavni dio.

Branko Zrno zahvalio se gospodi Agiću i Mc Laneu. Rekao je da su članovi Komisije u inferiornom položaju s obzirom da još nisu dobili ovaj nacrt zakona, te ova izlaganja mogu prihvatiti samo kao informaciju. Kada Prijedlog zakona bude dostavljen u parlamentarnu proceduru, Komisija će se o njemu izjasniti što prije, s obzirom da je ovo gorući problem s kojim se BiH susretala cijelo proteklo ljeto, te predstavlja stvarno upozorenje svima o neophodnosti donošenja ovakvog zakona. Naglasio je da će se Komisija o datim informacijama posebno odrediti, ali i da mora sačekati rezultate rada Interresorne radne grupe.

Šefik Džaferović zahvalio se predstavnicima Ministarstva sigurnosti BiH na datim informacijama, s obzirom da je u BiH u ljetnim mjesecima bio jasno izražen problem vezan za zaštitu ljudi i imovine od požara. Čak i da nije bilo ovih informacija na sjednici, Komisija bi trebalo da razmotri postojeće stanje. Stoga Komisija treba dati podršku prijedlozima rješenja koja dolaze iz Ministarstva sigurnosti BiH i Štaba NATO-a, te se zahvaliti Štabu NATO-a na podršci. Predložio je zaključak kojim Komisija podržava aktivnosti na izradi Zakona koje se vode u Ministarstvu sigurnosti BiH, a koje podržava NATO.

Hazim Rančić je, pored podrške prijedlogu zaključka Šefika Džaferovića, sugerirao da Komisija prihvati i prijedlog zaključaka koje je dao pomoćnik ministra sigurnosti BiH, te da se pomenuti zakon sačini u formi prijedloga, te razmatra i usvaja po hitnoj proceduri.

Vinko Zorić naglasio je potrebu da navedeni zakon Komisija dobije već u formi nacrtu, radi blagovremenog informiranja.

Slobodan Šaraba također se zahvalio na dobivenim informacijama. On je ovu inicijativu snažno podržao s obzirom da dolazi iz Općine Trebinje gdje je izgorjelo 12.000 hektara šume i štete se mjere na nekoliko miliona konvertibilnih maraka. Istakao je da je donošenje ovakvog zakona politički proces. Mišljenja je da postojeći problem treba rješavati nabavkom savremenih materijalno-tehničkih sredstava, kao što su kanaderi, helikopteri i sl., koji će biti smješteni blizu mjesta izloženih ovakvim uticajima. Također, iskazao je i potrebu za formiranjem regionalnih operativnih jedinica u koje bi bili uključeni predstavnici više država iz okruženja, kao što su npr. Srbija, Hrvatska, Crna Gora i dr. Na kraju je naglasio neophodnost postojanja bolje koordinacije u ovoj oblasti u našoj zemlji.

Mirko Okolić istakao je da su postojeći zakoni u ovoj oblasti dosta dobri, ali se postavlja pitanje njihovog poštivanja. Veliki razlog za ovu konstataciju on nalazi u materijalno-tehničkoj neopremljenosti. Od nadležnih štabova civilne zaštite treba da zatražiti i dobiti detaljan izvještaj o manjkavostima i nedostacima u dosadašnjem radu koje treba otkloniti, te se na osnovu toga opredijeliti o pitanju izrade zakona. Ovdje je bitno spomenuti i dobru praksu otkrivanja požara koje imaju neke evropske zemlje. S ranim otkrivanjem požara, koje se npr. može realizirati putem angažiranja ljudi koji će raditi na ovom zadacima putem ugovora o djelu, mišljenja je da se može dosta uspješno odgovoriti ovim izazovima. Ovaj sistem zaštite on smatra prioritetnijim i boljim od

upotrebe kanadera i sličnih sistema za gašenje, koji mnogo više koštaju. Naglasio je i da postoji potencijalna opasnost od pojave poplava u zimskom periodu, te predložio aktivnosti na njihovoj prevenciji. Predložio je zaključak kojim bi trebalo zatražiti detaljan izvještaj o prethodnim požarima, kako bi se uočile sve slabosti, vidjeli razlozi koji su doveli do tako velikog broja požara i utvrdili načini za otklanjanje uočenih nepravilnosti.

Dužanka Majkić upitala je da li je rasprava o ovoj temi preuranjena s obzirom da je od institucija vlasti Republike Srpske dostavljeno mišljenje da određeni prijedlozi Radne grupe ne mogu biti prihvaćeni. Naglasila je da neka razmišljanja gosp. Mc Lanea na ovoj sjednici članovi Komisije treba da shvate kao informaciju o procesu izrade navedenog zakona. Niko ne spori činjenicu da je navedeni zakon potreban, ali ako se dogodi da bude neusaglašen u Radnoj grupi i potom takav dostavljen u parlamentarnu proceduru, postoji opasnost da ne bude usvojen. Zaključila je da Vijeće ministara BiH ne smije dostaviti Zakon u proceduru, a naročito ne u hitnu, dok se ne usaglase obje strane, s obzirom će Zakon doživjeti neuspjeh.

Adem Huskić istakao je kako je ovo odličan zakon i da nije dobro da se sada prave analize i čeka na njegovo donošenje. Ministarstvo sigurnosti BiH treba sačiniti tekst Zakona, a ova komisija treba da ga razmotri i po mogućnosti se dogovori što prije. Zakon treba sadržavati svih pet ciljeva naglašenih u informaciji Štaba NATO-a.

Mirko Okolić je, odgovarajući na raspravu prethodnika, naglasio da je tražio da se dostavi analiza o stanju vezanom za požare, kako bi se uočili propusti i vidjelo gdje se može pomoći i otkloniti nedostaci, a ne zbog osporavanja donošenja zakona.

Branko Zrno istakao je da će političko pitanje vezano za donošenje ovog zakona biti otklonjeno kada taj zakon bude dostavljen u parlamentarnu proceduru, s obzirom da je on pretpostavka efikasne zaštite ljudi i dobara. Zato datu informaciju, koja sadrži mjere i zaključke koje sam zakon treba sadržavati, na ovoj sjednici Komisija može samo primiti k znanju, s preporukom da se učini maksimalan napor na izradi što boljeg i kvalitetnijeg zakona.

Jozo Križanović naglasio je da je u BiH veoma korisno da se raspravlja o ovom problemu. Danas u BiH postoji dosta općina koje imaju vatrogasnu službu, ali su sve one jako neuređene i međusobno nekoordinirane. Također, ne postoji ni adekvatno tijelo za koordiniranje u ovoj oblasti, kao ni struktura koja će nam sugerirati ponašanje u ovakvim situacijama. Zakon se može donijeti, ali ni on ne rješava sve potencijalne situacije i probleme. Ovakve zakone npr. imaju i Grčka i Hrvatska, ali se opet susreću s problemima prilikom požara. Ovdje se radi o najširem društvenom problemu i odgovori na njega pokazuju zrelost društva kako da se bori protiv takvih izazova. Stoga treba istaći ulogu Zajedničke komisije i PSBiH u ovoj oblasti, koji ovo pitanje moraju najozbiljnije razmotriti i pokušati unaprijed pretpostaviti situacije koje se mogu desiti.

Selmo Cikotić, ministar odbrane BiH, u nekoliko teza je članovima Komisije dao određene informacije, komentare i preporuke. Tako je naglasio da će:

- Izvještaj o učešću Oružanih snaga BiH u gašenju požara, koji je pripremljen za Predsjedništvo BiH, biti dostavljen Komisiji;
- uz Izvještaj Komisiji biti dostavljena i informacija koja će u sebi sadržavati određene prijedloge u smislu tehničkog i finansijskog planiranja;
- Zakon o kojem se danas govorilo uključivati sveobuhvatan pristup;
- prevencija nesreća i rano uočavanje veoma su bitni, iako u sebi sadrže političku dimenziju koju treba uvažavati.

Samir Agić informirao je prisutne da je Ministarstvo sigurnosti BiH sačinilo analizu požara i sa smjernicama o tom pitanju sa sastanka ambasadora zemalja članica NATO-a u BiH uputilo Vijeću ministara BiH. Ministar sigurnosti BiH prezentirao je ovu analizu odnosno informaciju i pred Predsjedništvom BiH, koje je potom prihvatilo. Izrazio je žaljenje što nisu bili obaviješteni o tome da Komisija nema navedenu informaciju u kojoj postoje i određeni prijedlozi zaključaka. Istakao je da se kod Radne grupe za izradu teksta Zakona, koja i dalje radi, pokušava naći osnov zajedničkih odluka. Trenutno se obavljaju razgovori s Vladom RS-a kako bi se dobila i njihova podrška i ovaj zakon dostavio u parlamentarnu proceduru. Naglasio je da je već usaglašena jedna od spornih tačaka, koja se odnosi na uspostavu "državnog centra 112", te da se nada da će i ostale sporne tačke,

kao npr. uključivanje institucija BiH u zaštitu od požara i druge biti usaglašene uskoro. On je istakao da ovakav zakon može biti funkcionalan samo ako se usaglaise svi koji učestvuju u njegovom donošenju. On će, zajedno sa svojim kolegama u Radnoj grupi, preuzeti obavezu da Komisiji dostavi tražene informacije, kako bi se o ovom pitanju ubuduće izbjegle nepotrebne rasprave.

Bruce Mc Lane naglasio je da je rad članova Radne grupe uveliko uticao na sadržaj informacije koja je dostavljena članovima Komisije, te da će Ministarstvo sigurnosti BiH i Štab NATO-a izuzetno cijeliti napore kojima bi članovi Komisije uticali na članove Radne grupe u pravcu nalaženja rješenja u procesu izrade nacrtu/prijedloga zakona prije neke naredne nesreće. Ovdje je obavezno napomenuti pitanje neophodnosti regionalne saradnje. NATO će voditi računa da u ovakvim rješenjima ne dođe do ugrožavanja ustavnog poretka Bosne i Hercegovine. On je naglasio da se ovdje ne radi o prijenosu ovlaštenja na relaciji entitet-država ili općina-entitet, već o potrebi bolje koordinacije kako bi se svi raspoloživi kapaciteti na najbolji i najjeftiniji način iskoristili kada dođe do nesreće. Još jednom se zahvalio članovima Komisije i istakao da će sa zadovoljstvom podnijeti izvještaj svojim nadređenim u Briselu o pozitivnim reakcijama s ove sjednice Komisije.

Nakon rasprave, **Branko Zrno** formulirao je prijedloge sljedećih **zaključaka**:

1. Zajednička komisija podržava i prihvata Informaciju, čija rješenja treba ugraditi u navedeni zakon;
2. Komisija apelira na Interresornu radnu grupu da intenzivira rad na izradi Prijedloga zakona o zaštiti i spašavanju ljudi i materijalnih dobara od prirodnih i drugih nesreća u BiH i njegovom što hitnijem upućivanju u parlamentarnu proceduru.

Navedene zaključke članovi Zajedničke komisije jednoglasno su usvojili.

Ad.3. Razmatranje Prijedloga zakona o dopunama Zakona o odbrani BiH (predlagači: poslanik Momčilo Novaković i delegat Slobodan Šaraba)

Branko Zrno informirao je da Komisija još nije dobila mišljenje Vijeća ministara BiH o Prijedlogu zakona o dopunama Zakona o odbrani BiH, koje je zatražila već nekoliko puta. Zato je predložio članovima Komisije da se ovaj zakon ne razmatra na sjednici, kao i da se ubuduće ne stavlja na dnevni red, sve dok se pomenuto mišljenje ne dobije.

Navedeni prijedlog prihvaćen je jednoglasno.

Ad.4. Prijedlozi mjera za rješavanje problema navedenih u Informaciji Granične policije BiH o stanju u ovoj instituciji, dostavljenoj po zaključku Zajedničke komisije

Branko Zrno je u uvodnim napomenama istakao da je Informacija s prijedlogom mjera dostavljena na inicijativu Komisije. Predložio je da se Informacija, ako nema određenih dopuna, usvoji i uputi, od Komisije kao ovlaštenog predlagača, u oba doma Parlamentarne skupštine BiH.

Adem Huskić podržao je predložene mjere, ali je predložio i da se dopune zaključkom Komisije s prošle sjednice u dijelu koji se odnosi na potrebu kadrovske popune.

Jozo Križanović također je naglasio da cijeni dati prijedlog mjera u kojima su navedena četiri goruća problema, ali i da se u nekim tačkama može stvoriti i određena rezerva u smislu da li ovakav prijedlog treba dostaviti domovima PSBiH. Istakao je da Komisija treba podržati potrebu rješavanja problema navedenih u ovoj informaciji, te predložio da se od Vijeća ministara BiH zatraži donošenje konkretnih odluka i rješenja.

Šefik Džaferović istakao je da je data informacija s prijedlogom mjera rezultat parlamentarnog nadzora Zajedničke komisije. Komisija je navedene akte zatražila od Granične policije BiH nakon posjete njenom sjedištu i Terenskom uredu u Višegradu. Saglasan je s mišljenjem da informacija

u datom obliku ne treba biti razmatrana niti biti osnov rasprave pred domovima Parlamentarne skupštine BiH, ali se svakako treba otvoriti rasprava o ovom pitanju pred domovima. Prijedlozi zaključaka s ove sjednice Komisije treba da budu osnov rasprave, koje Parlamentarna skupština BiH treba osnažiti svojim usvajanjem.

U tom smislu predložio je da Zajednička komisija sačini navedene prijedloge zaključaka za raspravu u domovima PSBiH o stanju i problemima u radu GP. Zajednička komisija treba svojim prijedlozima zaključaka istaći da je razmatrala dostavljenu informaciju i Prijedloge mjera i tom prilikom konstatala postojanje značajnih problema koji otežavaju efikasan rad Granične policije BiH. Ovi problemi odnose se na rješavanje pitanja: gazdovanja i upravljanja graničnim prijelazima, adekvatnog smještaja GP na graničnim prijelazima, kadrovske popunjenosti, te materijalno-tehničke opremljenosti. U tom smislu Komisija treba predložiti domovima PSBiH raspravu i rješenje problema u navedene četiri oblasti rada GP.

Vinko Zorić istakao je da je ovaj prijedlog dobar, te da treba djelovati hitno zbog izrade i usvajanja Budžeta za 2008. godinu.

Mirko Okolić sugerirao je da bi Komisija trebalo da dostavi ovaj materijal prije svih Vijeću ministara BiH, s prijedlogom za rješavanje iskazanih problema. Vijeće ministara BiH se dalje o tome treba izjasniti i dati odgovore na ova pitanja, nakon čega bi se informacija uputila u Parlament na usvajanje.

Šefik Džaferović ponovio je ranije dati prijedlog zaključka, s tim da se predstavnicima Vijeća ministara BiH, radi njihove adekvatne pripreme, uputi pismo u kojem ih treba obavijestiti da će ova informacija biti, kao tačka dnevnog reda, razmatrana na narednoj sjednici.

Nakon rasprave, članovi Komisije jednoglasno su prihvatili prijedlog **zaključaka** Šefika Daferovića, kao i prijedlog Adema Huskića za njihovu dopunu zaključkom s prethodne sjednice, u sljedećem tekstu:

„1. Domovi Parlamentarne skupština BiH i Zajednička komisija za odbranu i sigurnost BiH od Vijeća ministara BiH zahtijevaju hitno rješavanje problema u Graničnoj politici BiH, koji se odnose na pitanje:

- a) gazdovanja i upravljanja graničnim prijelazima;
- b) adekvatnog smještaja GP na graničnim prijelazima;
- c) kadrovske popunjenosti;

S ciljem rješavanja ovog pitanja, predlaže se Vijeću ministara BiH da sačini plan za popunjavanje radnih mjesta i to licima koja su proglašena viškom u procesu reforme odbrane, te licima sa statusom povratnika u prijeratno mjesto prebivališta;

- d) materijalno-tehničke opremljenosti.

2. O preduzetim aktivnostima za rješavanje navedenih pitanja Vijeće ministara BiH treba u što kraćem roku informirati domove i Zajedničku komisiju za odbranu i sigurnost Parlamentarne skupštine BiH.“

Ad.5. Zahtjev Odbora za sigurnost NSRS-a za dostavu informacije o pitanjima provođenja Zakona o odbrani BiH i Zakona o službi u OSBiH, kao i zakona iz oblasti sigurnosti

Branko Zrno informirao je o zahtjevu Odbora za sigurnost NSRS-a i istakao da Komisija ima obavezu dostavljanja informacija samo domovima Parlamentarne skupštine BiH. Pri tome je naglasio da su sjednice Komisije otvorenog tipa i da odgovarajući odbor NSRS-a uvijek može poslati svog člana da prisustvuje i izvještava NSRS o dešavanjima na ovim sjednicama.

Vinko Zorić predložio je da Komisija odgovori na navedeni dopis izražavajući nejasnoću u smislu zašto ovaj odbor ovo uopće traži, ali i objasniti da su njihovi predstavnici uvijek dobrodošli na sjednice ove komisije.

Šefik Džaferović mišljenja je da na navedeni zahtjev treba odgovoriti. On je istakao da u radu Komisije ništa nije sakriveno ni tajno, ali da ne postoji obaveza Komisije da podnosi informaciju bilo kome osim domovima Parlamentarne skupštine BiH, a što ova komisija redovno i čini.

U odgovoru Odboru za sigurnost treba navesti tu činjenicu, kao i činjenicu da je rad Komisije javan, te da se svako može informirati o njenim aktivnostima, direktno na samim sjednicama ili posredstvom stručnih službi.

Slobodan Šaraba i **Mirko Okolić** saglasni su sa svojim prethodnicima o potrebi da se na ovaj dopis odgovori. Također su mišljenja da se predstavnicima Odbora, kao i predstavnicima nadležnih komisija u Parlamentu FBiH, treba naglasiti da mogu prisustvovati sjednicama, te da bi im trebalo i redovno dostavljati pozive.

Christian Haupt naglasio je da je navedeni zahtjev rezultat od NSRS-a usvojenog Zakona o parlamentarnom nadzoru nad odbranom i sigurnosti, koji je usaglašen nakon usvojenih reformskih zakona u oblasti odbrane.

Jozo Križanović upitao se da li Komisija uopće može komentirati najznačajnija pitanja provođenja Zakona o odbrani BiH i Zakona o službi u OSBiH. Ako Odbor želi znati šta Komisija, u stvari, radi po ovom i sličnim pitanjima, predložio je da im se dostavi posljednji izvještaj o radu Komisije ili zapisnik s određene sjednice. U svakom slučaju, i on je saglasan s tim da se Odboru NSRS-a uputi dopis kojim će biti obaviješteni da su dobrodošli na sjednice Zajedničke komisije.

S konstatacijom **Jose Križanovića** da se dostavi i Izvještaj o radu Komisije za 2006. godinu saglasila se i **Duška Majkić**.

Selmo Cikotić istakao je da uvažava pristupe svih poslanika, te naglasio potrebu isticanja pozitivnih rezultata do kojih se dolazi provođenjem usvojenih zakona.

Igor Crnadak napomenuo je da je reforma odbrane do sada najbolje urađena reforma. Njena ključna stvar je to što je ona prošla sve institucije BiH. Od pada tzv. aprilskog paketa ustavnih promjena u BiH je nastupila određena radikalizacija političke scene. Ipak, na Ministarstvo odbrane BiH nije se negativno reflektirala ta situacija, te je ono nastavilo i dalje izvršavati svoje obaveze kao i do tada. Ministarstvo i dalje ima obavezu zadržati dobru atmosferu. Zajednička komisija i Ministarstvo sigurnosti BiH zato treba da imaju komunikaciju s entitetskim komisijama, te nemaju razloga ne informirati ih dokle se došlo na reformskom putu odbrane. Zaključio je da se može napraviti kvalitetan kanal informiranja između Zajedničke komisije i komisija koje se ovim pitanjima bave na entitetskim nivoima.

Branko Zrno zaključio je da o ovom pitanju, dakle, ne postoje dileme i predložio **zaključke** koji su proistekli iz rasprave, u sljedećem tekstu:

1. Zajednička komisija za odbranu i sigurnost BiH je radno tijelo Parlamentarne skupštine BiH, kojoj je, saglasno odredbama poslovnika njenih domova i Zakona o odbrani BiH u konkretnom slučaju, isključivo i jedino obavezna podnositi izvještaje i informacije, a što ovo tijelo redovno i čini.
2. Rad Zajedničke komisije u potpunosti je javan, a njene sjednice oglašavaju se redovno putem web stranice. Sjednice ove komisije otvorene su za sve predstavnike radnih tijela entitetskih parlamenata koji im žele prisustvovati i na taj način neposredno se informirati o svim pitanjima koje smatraju značajnim za procese u oblasti odbrane i sigurnosti u BiH, kako bi potom mogli informirati svoje skupštine kojima direktno odgovaraju. Također, u nadležnim službama Parlamentarne skupštine BiH mogu se dobiti sve potrebne konkretne informacije i akti za koje bude iskazana potreba.
3. Zajednička komisija odlučila je u prilogu ovog odgovora dostaviti Odboru za sigurnost NSRS-a Izvještaj o radu za period 2003.-2006., koji je usvojila Parlamentarna skupština BiH, kako bi se upoznali s aktivnostima urađenim tokom navedenog perioda.

Navedene zaključke članovi Zajedničke komisije usvojili su jednoglasno.

Ad.6. Razmatranje prijedloga zaključaka s radionice održane na Jahorini o temi: „Stanje u oblasti naoružanja i municije u Bosni i Hercegovini“

Branko Zrno predložio je usvajanje Prijedloga zaključaka koji su članovima Komisije dostavljeni, s obzirom da su svi članovi Komisije prethodno već informirani o rezultatima rada radionice održane na Jahorini.

Adem Huskić predložio je korekciju koja se odnosi na ispravljanje datuma u ovim zaključcima.

Nakon rasprave, članovi Komisije jednoglasno su, s korekcijom koju je predložio Adem Huskić, usvojili predložene zaključke.

Ad.7. Razmatranje Peticije-zahitjeva za dodjelu tuzlanske kasarne „Husein-kapetan Gradašćević“ Univerzitetu u Tuzli (podnosioci: udruženja građana)

Predsjedavajući **Branko Zrno** istakao je da razmatranje ove peticije nije u nadležnosti Zajedničke komisije, te da ovaj zahtjev Komisija treba uputiti Ministarstvu odbrane BiH i Vijeću ministara BiH, kao nadležnim za rješavanje navedenog pitanja. O navedenom Komisija će obavijestiti i podnosiocima zahtjeva.

Nakon kraće rasprave članovi Komisije jednoglasno su prihvatili prijedlog Branka Zrne.

Ad.8. Tekuća pitanja

Dragica Hinić informirala je članove o pozivima koji su Komisiji dostavljeni u periodu između dvije sjednice, te u dogovoru s predsjedavajućim i ostalim članovima utvrdila listu lica koja će prisustvovati ovim skupovima.

a) Poziv Zajedničkoj komisiji za posjetu Parlamentu, radnim tijelima i nadležnim ministarstvima SR Njemačke, od 23.10. do 26.10.2007. godine

Zajednička komisija predložila je kolegijima domova PSBiH da se u bilateralnu posjetu institucijama savezne Republike Njemačke, od 23.10. do 26.10.2007., upute sljedeći članovi Komisije: Branko Zrno, Šefik Džaferović, Slobodan Šaraba, Drago Kalabić, Adem Huskić, Jozo Križanović, Ivo Miro Jović, Vinko Zorić i Hazim Rančić, te sekretar Komisije Dragica Hinić i stručni savjetnik Željko Grubešić.

b) Poziv Zajedničkoj komisiji za posjetu Štabu NATO-a u Briselu, od 11.11. do 14.11.2007. godine

Zajednička komisija predložila je kolegijima domova PSBiH da se u posjetu Štabu NATO-a u Briselu upute: Branko Zrno, Šefik Džaferović, Slobodan Šaraba, Hazim Rančić, Jozo Križanović, Drago Kalabić, Adem Huskić, Vinko Zorić, Mirko Okolić, Dušanka Majkić, Dragica Hinić i Željko Grubešić.

c) Poziv za radni sastanak o malom i lakom naoružanju i municiji i njegovom raspolaganju, 13.9.2007. godine u Sarajevu (Radna grupa Ministarstva odbrane BiH)

Zajednička komisija odlučila je da će sastanku prisustvovati Dragica Hinić.

d) Poziv MVP-a za učešće u modulu o temi „Parlamentarne perspektive u oblasti odbrambene i sigurnosne politike EU

Ovom pozivu će se u ime Zajedničke komisije odazvati i programu obuke prisustvovati zamjenik predsjedavajućeg Šefik Džaferović.

e) Poziv za sastanak eksperata Maršal Centra o Individualnom partnerskom akcionom planu (IPAP), 14.9.2007. godine u Sarajevu

Na sastanku eksperata Maršal Centra će u ime Komisije prisustvovati sekretar Komisije Dragica Hinić, te stručni savjetnik Željko Grubešić.

f) Poziv Ministarstva odbrane BiH na diskusiju o Nacrtu procjene planiranja i revizije i razvoja partnerskih ciljeva za BiH, 24. 9.– 26. 9. 2007.

Na poziv će se u ime Zajedničke komisije odazvati član Komisije Mirko Okolić.

Zapisnik sačinila
Dragica Hinić

Predsjedavajući
Zajedničke komisije
Branko Zrno